

水心集

冊二



水心文集卷之二

狀表

安集兩淮申省狀

右逐一開具在前外然其間利害曲折亦復不少某竊照去歲虜入兩淮所殘破處安豐濠盱眙楚廬和揚凡七郡其民奔迸渡江求活者幾二十萬家而依山傍水相保聚以自固者亦幾二十萬家今所團結卽其保聚不流徙者雖不能盡在其中大約已十餘萬家矣其流徙者死於凍餓疾疫幾殫其半而保聚之民亦有爲虜驅掠而去者散爲盜賊則又不在焉度今七郡之民通計三十萬家和議未定室廬不成就使和議有定其短長之期又未可知此三十萬家者終當皇皇無所歸宿蓋淮上四戰之場虜敵往來之地民生其間勢固應爾然自古立國未嘗不有以處之也無以處之則地爲棄地而國誰與共守設使今歲邊報復急此三十萬家者又將奔迸流徙而喪其生乎春秋戰國之時晝國而守大爲城邑小爲壘壁百里之國皆有邊面自非暴君苛政其民未嘗散

之四方兩漢以後裂爲南北中原不合者凡數百年人在戰地各自爲家養生
送死老子長孫未嘗有闕彼非有以自守不肯輕棄其鄉安能如此自唐以後
至於本朝以和戎爲國是千里之州百里之邑混然一區煙火相望無有捍蔽
一旦胡塵猝起星飛雲散無有能自保者南渡之後前經逆亮之禍近有僕散
揆之寇累世生聚一朝蕩然故某昨於國家營度規恢之初以爲未須便倣且
當於邊淮先募弓弩手耕極邊三十里之地西至襄漢東盡楚泗約可十萬家
列屋而居使邊面牢實虜人不得踰越所以安其外也蓋漢唐守邊郡而安中
州未有不如此者也今事已無及長淮之險與虜共之惟有因民之欲令其依
山阻水自相保聚用其豪傑借其聲勢縻以小職濟其急難春夏散耕秋冬入
保大將憑城郭諸使總號令虜雖大入而吾之人民安堵如故扣城則不下攻
壁則不入然後設伏以誘其進縱兵以擾其歸使此謀果定行之有成又何汲
汲於畏虜乎所以安其內也夫徒手搏虎以幸其斃一夫之勇也一夫之勇未
必驗而一夫之怯其爲驗也決矣爲天下者不以天下之大而就一夫之勇故

某願朝廷以謀困虜以計守邊安集兩淮以捍江面使淮人不遁則虜又安敢萌窺江之謀乎故堡塢之作山水寨之聚守以精志行以強力少而必精小而必堅毋徇空言而妨實利則今日之所行與漢唐之屯田六朝三國春秋之壘壁彼各有以施之不相謀而相得故也伏乞照會指揮施行

定山瓜步石跋三堡塢狀

某昨蒙差兼江淮制置專一措置屯田被命之始卽嘗深念以爲今之屯田與昔不同夫省運就糧分兵久駐磨以歲月待敵之變此昔日屯田之常論也頃自虜寇驚騷淮人奔迸南渡生理破壞田舍荒墟十郡蕭然無復保聚今之所急在於耕其舊業而復其所常安守其舊廬而忘其所甚畏爾豈得以昔日之常論冒行之乎故某遽急且於江北創立三堡先作一層今三堡旣就流民漸歸所宜招徠安集量加賑貸令於東西一二百里南北三四十里之內其舊有田舍者依本住坐元無本業隨便居止其間有強壯者稍加勸募給之弓弩教以習射時命程試利以賞激度一堡界分內可得二千家爲率萬一虜騎今秋

再至隨處入堡與官兵共守此今日經營之大略也至於屏蔽江南防把口岸則其說尤長敢不盡布愚悃某去歲忝綴朝列首建防江之議繼來建康攷詳前後案牘無非葺治戰艦布列岸兵栽埋鹿角釘設暗樁開掘溝塹計步而守數里而屯皆元勳故老之已行謀臣策士之素講雖其間用之有利不利然終未有能捨此而特立者也況某晚進末學何所能爲不過守舉舊事期於無闕而已如鹿角暗樁之類去歲論者固嘗指爲兒戲及扣其別有何策則又寂無所言某猶謂厲人心而堅守阻大江而自固則如前數事亦豈不足以立功至十月之末邊遽告急淮人渡江以億萬計江南震動衆情惶惑一日有兩騎僞效番裝躍馬江岸相傳虜人至矣濟渡之舟斫纜離岸櫓楫失措渡者攀舟覆溺數十百人某始歎息曰是真不足賴也今雖岸步有寨江流有船鹿角暗樁數重並設溝塹深闊不可越踰其如人心已搖誰與力拒萬一虜兵果至彼皆棄之而走爾所以建炎紹興之間兀朮輩未嘗不徑渡江南如逆亮之不得濟而殞者幸也於是始捐重賞募勇士渡江北劫虜營石跋定山上下凡十數往

返取其俘馘繫纍以報江南奮氣見者賈勇而人心始安虜亦繇此卷甲遁矣
然後知三國孫氏常以江北守江而不以江南守江至於六朝無不皆然乃昔
人已用之明驗自南唐以來始稍失之故建炎紹興不暇尋繹爾然渡江之兵
苦於江北無家基寨無所駐足故石斌賢之徒不能成大功宣司嘗急呼封彥
明王益欲令將兵策應和州竟閔嘿而止今石跋則屏蔽采石定山則屏蔽靖
安瓜步則屏蔽東陽下蜀西護溧陽東連儀真緩急應援首尾聯絡所築皆是
故基磚石猶在今各堡無事之時只以五百人一將戍守常加修葺勿使廢壞
收聚居民與之爲主令岸渡繁會自成市井若萬一有警乞從朝廷卽令各堡
增募一千人照吐渾等仗並與幫收總領所請給隨堡防守教閱諸州禁兵抽
摘二千人以九月至并於防江效用內摘那千人各堡二千五百人并堡塢內
外居民二千家之勝兵者或臨時旋行招募亦各二千人各堡通爲四千五百
人相共守把然後令制置司以八九月別募精勇敢死士千人厚幫請給以待
劫寨焚糧直前搏擊之用蓋堡塢之成於防江有四利往日江南列營五萬人

去歲亦不下三萬而民兵不預然止可坐食而守敵果窺江責其不走固已難矣而況進戰乎何者虜在北岸共長江之險兵衆騎多而吾軍之氣已奪矣今堡塢旣立虜有所忌固不敢窺江就使來窺江南岸兵膽氣自生志力得展使之前進無所畏怯一利也雖有各處戰艦然虜已在江岸或聲言奪船徑渡或實爲造舟之勢我之舟師往往不敢放出北岸勝負未決旁觀膽落憂恐萬端今堡塢旣成虜縱在江北我有應接之利或近岸排列千弩並發或捨舟登岸乘勢擊逐二利也至於海舟風帆八面便利捷疾尤在舟師之上然迫虜於岸而收全功者其勢易俟其入江而決死鬪者其勢難今堡塢旣成有易無難三利也戰艦甲士虛閑舟中擁戈坐觀從昔病之無策可治今舟得便利人無虛設四利也使虜果忌堡塢爲彼之害或擁大衆志在必取今石跋瓜步近在江津定山去江纔三里爾我以戰艦海舟爲江中家計強弩所及虜人腹背受敵自投死地理在不疑脫若虜人畏而不前置而不問盡力攻擊和除真六合等城或有退遜我以堡塢全力助其逐襲或迎其前或出其後制勝必矣此堡塢

之利所以爲用力寡而收功博孫氏六朝以江北而守江南能立國於百戰之餘者非幸也數也故某欲因屯田堡塢之立收兵民雜守之用屏蔽江面先作一層使江北之民心有所恃虜雖再來不復求渡騰突紛擾貽亂江南次第入深因其險要用其豪傑見團結山水爲寨者四十七處此於官司之力無緣周遍特借以聲勢使自爲守春夏散耕秋冬入堡蓋孫氏六朝保固江淮之成規非充國先零賈祗許下之謂也不然則南北並爭之際無歲不有兵革淮人豈能屢逃屢復以自濱於流離死亡也哉某自去冬憂悸熏心舊疾之外復增新病背痛半年呻吟宛轉自有改兼江淮之命不敢辭避力疾督趣成此三堡其間條目極有未備而某羸證旣成不能扶持忍死以待畢事豈勝慚懼伏乞朝廷速賜選擇總練通方老於智謀之士前來建康糾剔某妄作疎漏之失攷尋前史規畫縝密之舊克集功緒以究遠圖某不任祈叩之至所有定山瓜步石跋三處堡塢圖本并四十七處團結山水寨居民戶口姓名帳策謹隨狀繳申伏乞指揮施行

辭免華文閣待制提舉西京嵩山崇福宮狀

次對之職爲選甚高曩玷留都雖嘗假寵退甘窮巷固已黜幽恍歲月之屢遷何夢寐之敢及七十旣至一再控陳但得歸休便爲止足豈意矜憐枯瘁委曲陶鎔特畀新除復還舊物然而竊尋故實兼考前文惟必諧告老則或容賦祿以示恩今猶使奉祠則安得因閑而冒受夙夜自揆震驚靡遑伏乞俯諒微誠特賜敷奏寢免華文閣待制恩命只以本官依舊宮觀不越常分庶幾少安無任跼蹐俟命之至

辭免除寶謨閣直學士提舉鳳翔府上清太平宮狀

聞命殊常省躬震越蓋臣子年耄而食貧上所矜閔則爲之改祠賦祿所以示恩也至於超進職名寵光榮耀將以爲勸則非德進而業廣不在茲選某頽齡暮景貧病交迫伏蒙至仁曲加憐念特畀祠官所宜祇服恩私俯僂拜受無敢後矣恭惟先帝大訓華閣祕藏學士寓直最爲清近而某志行凋落問學空殫性與年徂材隨老盡儻若貪榮冒處不知自引是彰聖朝濫予之過而非所以

爲勸也伏望鈞慈特賜敷奏令某止仍舊職寅奉新祠所有寶謨閣直學士恩命乞賜寢免不勝俟命之至

辯兵部郎官朱元晦狀

臣聞臣子告君父之言必以實非其實而敢告者惟私意之是徇而忘君父之爲不可欺者也臣竊見近日朱熹除兵部郎官未供職間而侍郎林栗急劾去之士論怪駭莫測其故蓋熹素有文學行誼居官所至有績因王淮深惡之遂不敢仕陛下差熹江西提刑使之奏事熹趨起辭避終未敢前淮旣罷去陛下趣熹入對用爲郎官人知陛下進熹有漸無不稱慶忽爲栗誣奏逐去衆議所以洶洶不平臣始疑之以爲栗何故至此得非熹果有罪外人不能知而栗獨得其實以告陛下也暨栗劾奏熹文字傳播中外臣始得以始末參驗然後知其言熹罪無一實者特發於私意而遂忘其欺爾栗雖貴而近臣雖賤而遠然臣子之於君父大義一也烏有栗以熹不實之罪欺罔君父之前而臣忍不以實陳於陛下乎栗言熹敢自稱私計非便只欲回就江西提刑已受省劄不肯

赴部供職臣聞熹既受除郎官省劄即時遣回江西提刑司接人客將兵卒等皆已辭去其時朝士有候熹者皆共見之熹以脚疾發動不任下牀遂申尙書省乞給假俟痊安日供職是栗謂熹只欲回就江西不肯供職者非其實也栗言熹四司郎官廳印記不肯收受推出門外令送長貳緣長貳不合收管郎官廳印記臣再令送還仍加鑄諭既能出入宮門上殿奏事并遍謁宰執臺諫即乘轎入部供職良不爲難兼郎官印記難以棄擲在外慮有失去其朱熹堅執不從臣爲貳卿不能率屬致其偃蹇拒違君命實負慚德所有印記無所歸着不免令四司人吏抱守終夕至于達旦且臣聞熹未對之前脚疾已作當對之日偶然少止對下之日後與宰執臺諫相見脚疾痛復劇既申尙書省祇受恩命止乞給假供職適會歇泊旬休未及將上所有郎官印記熹既未供職豈可受乎熹已申省乞給假矣雖欲聽栗鑄諭而扶曳供職可乎郎官未供職以前印記合是何官收掌此正長貳之所當知其可推以委熹乎是栗謂熹不受印記偃蹇拒違君命非其實也栗又言熹本無學術徒竊張載程頤之緒餘以爲

浮誕宗主謂之道學妄自推尊所至輒攜門生十數人習爲春秋戰國之態妄希孔孟歷聘之風繩以治世之法則亂人之首也臣聞朝廷開學校建儒官公教育於上士子闢家塾隆師友私淑艾於下自古而然矣使熹果無學術歟人何用仰之果有學術歟其相與從之者非欲強自標目以勸人爲忠爲孝者乃所以爲人材計爲國家計也惟蔡京用事諱習元祐學術曾有不得爲師之禁今栗以諸生不得從熹講學爲熹之罪而又謂非治世之法宜禁絕之此又非其實也栗又言熹欲索高價妄意要津傲睨累日不肯供職以爲作僞有不可掩夫栗逆探熹之用心而暴揚之此非臣之所得知也臣所得知者熹以今月初八日除郎十一日再爲江西提刑栗之劾熹當在初九初十爾相去隔日之間而栗以熹累日不肯供職是栗急於誣熹而不自顧其言之非實也栗又言陛下愛惜名器館學寺監久次當遷郎官者只令兼權其視郎選亦不輕矣而熹乃輕之兵部郎官本係大宗丞計衡兼權以熹之故移計衡於都官而以兵部處熹所以待熹亦不薄矣而熹乃薄之臣聞陛下明詔曾任監司知縣者始

得除郎其事久矣館學寺監雖久次而未嘗歷知縣監司則不可兼權豈得謂其當遷郎哉除差之際那換闕次移衡用熹熹何德焉是又栗急於誣熹之罪組織其言語足其文爾而不自顧其言之非實也栗又言職制者朝廷之紀綱熹既除兵部在臣合有統攝乞將熹新舊任並且停罷臣聞唐左右丞進退郎官矣本朝故事未之或然惟臺諫彈劾有停斥之請給舍繳駁有寢罷之文至於六部寺監舉劾其屬必曰乞行迴避微其文婉其義所以重臺綱尊國體也今熹得爲栗之屬尙未供職而栗望風劾之且兼有給舍臺諫繳劾百官之例何哉栗以職制紀綱劾熹而先自亂之是職制紀綱非其實也凡栗之辭始末參驗無一實者至於其中謂之道學一語則無實最甚利害所係不獨朱熹臣不可不力辯蓋自昔小人殘害忠良率有指名或以爲好名或以爲立異或以爲植黨近創爲道學之目鄭丙倡之陳賈和之居要津者密相付授見士大夫有稍慕潔修羸能操守輒以道學之名歸之以爲善爲玷闕以好學爲過愆相爲鉤距使不能進從旁窺伺使不獲安於是賢士惴慄中材解體銷聲滅影穢

德垢行以避此名殆如喫菜事魔影迹犯敗之類往日王淮表裏臺諫陰廢正人蓋用此術此於陛下彰善黜惡封殖人才以爲子孫無窮之命者其損不細矣栗爲侍從就其蹇淺無以達陛下之德意志慮示信於下而更襲用鄭丙陳賈密相付授之說以道學爲大罪文致語言逐去一熹自此游辭無實讒口橫生善良受禍何所不有臣伏見栗恥不得與廟號之議遂爲樂堯之說而人知其橫怒詳定所人吏執覆遂請罷局而人知其專而況職匪風聞古有常守今又苟恣一身之狠愎不畏君父之高明公形無實之言顯逐知名之士陛下原其用心察其旨趣舉動如此欲以何爲誠不可不預防不可不早辯也臣去冬蒙恩面對論一大事有四難五不可之條其說至長未獲究竟方齋心滌慮以俟陛下反覆詰難庶幾竭盡愚衷今以郎官去留何至上封事譏譏徒溷宸慮哉蓋見大臣以下畏栗兇醜莫敢明辯積在厲階將害大體爾伏願陛下正紀綱之所在絕欺罔於旣形無惟其近惟其賢無惟其官惟其是摧折暴橫以扶善類奮發剛斷以慰公言國家之本孰大於此臣不勝效忠思報之至干冒宸

嚴伏地待罪

淮西論鐵錢五事狀

臣竊見近歲私鑄鐵錢散漫江淮公私受弊人情搖動其事多端幸蒙朝廷不惜厚費特與收換始得寧貼臣昨在蘄州目見利害詢探吏民頗爲親切今暫領兼司所當隨時補緝務使淮人迄臻安靜謹具奏聞其事有五一日開民間行使之路二曰責州縣關防之要三曰審朝廷稱提之政四曰謹諸監鑄造之法五曰詳冶司廢置之宜何謂開民間行使之路始初鐵錢不分官私民間不辦好惡得錢便使自禁私錢百姓懲創賣買交關文文揀擇或將官錢指爲私錢不肯收受或只要一色樣錢

謂如舒蘄人各只使本監字號錢之類

或只要新鑄官錢且免揀

擇民旅持錢買物一貫之中常退出三四百至以米穀他物自相酬準城市尙可村落尤甚緣此行用艱難物貨稀少朝廷禁斷私錢本要流通官錢若官錢方更疑惑豈得穩便臣近以乾道同安蘄春大冶宿松漢陽定城新舊諸樣官錢釘板印榜曉諭民間令其從便行使亦立私錢樣令揀選不用令各州簽廳

官委諸縣釘樣於郡保又別差官親至村落委曲勸諭欲其耳目接熟用錢不疑須待官錢流通物價復舊方見禁斷私錢之利在臣本路已逐一如此施行其淮東湖北臣目所不見未知如何近因還司過蘄口鎮鎮民詣臣稱揚真泰州凡紹熙元年二年蘄春監所鑄錢皆嫌麤惡揀退不使臣尋令拆辯揀擇其字文模糊尤甚十居二三見已關會諸處別議措置然則揀擇用錢人情不甚相遠兼既有新舊諸錢并私錢色樣不一曾經揀換錢文牴牾若不於行使地分明加告報終恐向後用者疑惑臣不敢作冶司發往兩路州郡欲乞自朝廷降樣行下永遠照使要令村落僻遠認識不疑民旅交易流通無礙如此則既擾之精神可以收回人亦知收換之實利矣何謂責州縣關防之要兩路先後立限收換私錢淮東多而淮西少雖緣禁有遲速之故然積累數年委有許多私錢別無歸着其當與收換則一爾今已於限內申報盡絕而舊色私錢尙頗散在民間或限內齎赴不及出限不可投換或貫百少可無力投換或富人收藏意圖他時禁弛復得行用既各盡絕難卹其餘然市錢用之中常有夾帶所

幸民間識認擇出不要其新鑄私錢間有三兩文到市上者姦民窺伺豈肯遽已自禁戢以來號令紛紛爭爲嚴峻或令五家結甲或令旬申有無私鑄巡尉以捕捉入銜敗獲治經繇透漏沿流常要巡綽津渡皆須搜邏吏人甘伏決配官員當俟朝典臣檢照舊事及不住承準申明雖皆已遵守覺察然終未得關防之要必行則誣告羅織獄訟繁興泛行則便同文具姦宄仍在臣近令各州簽廳官責屬內廂巡地分都保等處專一禁止行使私錢之家旬具委無行使私錢結罪類申本司只此一令不必繁多但要行之堅久私錢無用私鑄自息此雖治司職事亦但可施之本路欲乞朝廷指揮於行使鐵錢州郡除照官錢色樣從便流通行使外並要本州月具更無行使私錢文狀結罪申尙書省蓋欲必無私鑄其說難信欲必不使私錢其事易遵況經收換朝廷爲民之意已足如有違戾懲治大吏一人自然震聳用命如此則令簡而可行實而可久矣何謂審朝廷稱提之政始作鐵錢非要添此一項泉幣蓋專以絕銅錢滲漏之患爾銅錢過江北既有鐵錢以易之矣鐵錢過江南亦必有銅錢易之可也今